

PIGNIA

Kino rumantsch – igl rumantsch viva

«Viver igl rumantsch!» – sut que moto stat egn sera curtasevla a legrevla par promover igl rumantsch. Intervestas, istorgias, sco ear egn'emissiun dad RTR digl on 1990 àn divertieu sonda igl publicum a Pignia an tut gros.

SIMONA BEELI/FMR

An egn faszinanta cumbinaziun da cultura a lungatg àn numerusas spectaturas a numerus spectaturs savieu giuder egn sonda sera plagn tensiun a Pignia. La tenda sen la plaza da scola eara amplanida cun giasts spanagieus da lungatg rumantsch, mo ear anzaquants da lungatg tudestg àn cato la veia an la vischnàceta.

Sut igl tetel «Kino Rumantsch Nocturn» steva egn vast program, ca tanscheva d'impressiuns da ple bòld antocen tier filmets actuals. Ear egn sorpresa – egn abitant da Pignia cun sias istorgias or da la veta – à betga manco. Rasponsabel par quella sera eara *Andrea Cantieni*, c'á organiso que evenimaint spezial cun agid da las quater uniuns, numnadameing la Cuminànza Culturala Val Schons, Viva Pignia, l'uniun Sutselva Rumantscha a l'uniun Rumantscha Grischun Central.

Istorgietas da rir da schlupar

Sen far notg resuna la melodeia da la canzun «La patria» – sunada digls frars Cantieni – atras la tenda plagna d'amateurs da la Rumantscheia. L'atmosfera da buna luna animescha gest da cantar cun. Senaquegl fa *Walter Battaglia*, ca magna tras igl program, egn cordial bagnvagnieu a preschainta igl cuntegn da la sera. Ear *Gierina Michael*, la co-presidenta da l'URGC tegna egn pled cun manzunar la fegnamira da las uniuns, peia da promover a surtut viver igl rumantsch. Suainter egn intermezzo digls frars Cantieni, santali cun egn canzun rumantscha da Tumasch Dolf, va'gl anavànt cun istorgias da *Dumeni Mani*. Igl satracta da raquinq-



Igls frars Cantieni àn procuro pigl divertimaint musical.



Dumeni Mani preligia las sias istorgias ca diverteschon igls preschaints.



Igl punct culminant dala sera e stada l'emissiun dad RTR digls 1990, emessa digl Plaz vischnànca d'Andeer.

FOTOS SIMONA BEELI

taziuns veras da sia unfanza, digl qual el à scret an egn cudesch cun ragurdànza. Risadas tünan tras la tenda, cura c'el preligia anzaquants istorgias, trànter oter cun igl tetel «Igls falambers» a «L'antscheata da far fagn». Da sia veta a Pignia ad an las muntognas raquenta el an egn moda humoristica a libra, tge ca vean ludo digl publicum cun grànd aplaus.

Films actuals a da ple bòld

Durànt egn curta posa e'gl pussevel da saproveder cun anzatge dabever par betga pitir la set. Igl program cuntinuescha cun la preschantaziun da duas intervistas cun parsunas da la Val Schons. *Casper Nicca* à registro pliras intervistas cun fotografieas a videos cun parsunas ca vivan an la regiun anturn igl Bavreg. Plagn marveglias àn igls giasts tarlo a vurdo, tge ca *Marlena Zinsli* a *Dumeni Mani* àn raquinto da lur veta.

Igl punct culminant e l'emissiun digl on 1990, egn produziun dad RTR. Segl Plaz vischnànca d'Andeer en da lez tains sarimno indigens, visitaders sco ear cors a musicas par festivar a undrar la Val Schons. Sacapescha ca la qualitat, mo ear igl stil da savastgir da la gliעד mussa, c'igl sattracta da tains passos. Igls visitaders digl «Kino Rumantsch Nocturn» sadiverteschan cunzund da las parsunas ancunaschaintas c'àn samido – near ear betga.

Egn sera gartageada

Igl vainter fa mal digl rir ad an egn'atmosfera par l'amur par igl lungatg tgata la sera egn fegn. La fegnamira da viver igl rumantsch e sirameing vagnida adamplida a caschun da la sera an cuminànza a Pignia.